



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-1259/02.

Sarajevo, 11. decembra 2002.

Z A P I S N I K

sa 3. sjednice Predstavničkog doma Parlamentarne skupštine Bosne i Hercegovine,
održane 11. decembra 2002. godine

Treća sjednica počela je s radom u 11,20 sati. Prisustvovala su 42 poslanika, s tim što je poslanik Vinko Zorić izvjesno vrijeme kasnio.

Pored poslanika sjednici su prisustvovali ministri Ante Domazet i Svetozar Mihajlović, te zamjenici ministara Muharem Imamović, Jusuf Halilagić, Gordana Ković, Milan Lovrić, Zora Marijanović i Vladislav Vladičić.

Iz međunarodnih organizacija su prisustvovali: Jan Piter Hoteldahl – ispred OHR-a, Wilma Theuns i Nada Simović – ispred OSCE-a, Sonja Moser Starach – ispred Vijeća Evrope, Nermina Kožljak – ispred National demokratskog instituta; Dauglas Jones i Mirsad Žiga – ispred Američke ambasade.

Na početku sjednice predsjedavajući Šefik Džaferović upoznao je poslanike da je u Predstavničkom domu formirano osam poslaničkih klubova, kako slijedi:

- Klub Stranke demokratske akcije sa 10 poslanika - Seada Palavrić, predsjedavajući, Elmir Jahić - zamjenik predsjedavajućeg;
- Klub Stranke za Bosnu i Hercegovinu sa 6 poslanika - Beriz Belkić, predsjedavajući, Izet Žigić, zamjenik predsjedavajućeg;
- Klub Srpske demokratske stranke sa 5 poslanika - Momčilo Novaković, predsjedavajući, Miloš Jovanović, zamjenik predsjedavajućeg;
- Klub Hrvatske demokratske zajednice sa 5 poslanika - Niko Lozančić, predsjedavajući, Martin Raguž, zamjenik predsjedavajućeg;
- Klub Socijaldemokratske partije sa 3 poslanika - Jozo Križanović, predsjedavajući, Selim Bešliagić, zamjenik predsjedavajućeg;
- Klub poslanika SNSD sa 3 poslanika - Nikola Kragulj, predsjedavajući, Milorad Živković, zamjenik predsjedavajućeg;
- Klub poslanika DNZ – HDU/NSRzB -BOS sa 3 poslanika - Ibrahim Đedović – predsjedavajući, zamjenici Mladen Potočnik, Muhamed Moranjkić;

- Klub poslanika SDU-NHI-SPU sa 3 poslanika - Sead Avdić – predsjedavajući, Ivo Lozančić, zamjenik predsjedavajućeg.

Potom je predsjedavajući za sjednicu predložio dnevni red koji je usaglašen na sastanku Proširenog kolegija prilikom sazivanja sjednice i koji su poslanici u pozivu dobili.

U okviru rasprave o prijedlogu dnevnog reda diskutovao je Nikola Špirić. Predsjedavajući je konstatao da 3. sjednica Doma ima sljedeći

DNEVNI RED:

1. Prijedlog Budžeta institucija BiH i međunarodnih obaveza BiH za 2003. i
2. Prijedlog zakona o izvršenju Budžeta institucija BiH i međunarodnih obaveza BiH za 2003. godinu.

Predsjedavajući je naglasio da će se obadvije tačke razamtrati u prvom i u drugom čitanju, u skladu s Poslovníkom Doma.

Ad – 1: Prijedlog Budžeta institucija BiH i međunarodnih obaveza Bosne i Hercegovine za 2003.

U ime Ustavno-pravne komisije Mirsad Ćeman je iznio mišljenje Komisije o Prijedlogu budžeta.

Beriz Belkić je u ime Komisije za finansije i budžet podnio Izvještaj te komisije o razmatranju Prijedloga budžeta.

Ministar za trezor institucija BiH Ante Domazet u ime predlagača obrazložio je Prijedlog budžeta institucija Bosne i Hercegovine.

U diskusiji u prvom čitanju učestvovali su: Nikola Špirić, Azra Hadžiahmetović, Munib Jusufović, Hasan Muratović, Seada Palavrić, Miloš Jovanović, Zlatko Lagumdžija, Tihomir Gligorić, Niko Lozančić i Sead Avdić.

Na pitanja postavljena u diskusiji odgovorili su ministar Ante Domazet i zamjenik ministra civilnih poslova Milan Lovrić.

Poslije ovih izlaganja Dom je usvojio Prijedlog budžeta u prvom čitanju. Od 42 prisutna poslanika 38 je glasalo ZA, a 4 poslanika su se suzdržala od glasanja.

Predsjedavajući Džaferović je otvorio raspravu u drugom čitanju i skrenuo pažnju na odredbu člana 94. Poslovnika u vezi s amandmanima. Konstatovao je da su u proceduri dva amandmana Nikole Špirića na Prijedlog budžeta, a da Kolegij nije dozvolio da se raspravlja o amandmanima podnesenim u toku sjednice.

Poslanik Milorad Živković izrazio je svoje nezadovoljstvo što Kolegij nije dozvolio da se u proceduru uzmu njegova dva amandmana koja je podnio na sjednici.

Vezano za amandmane diskutovali su Momčilo Novaković i Nikola Špirić. Potom je predsjedavajući amandmane dao na glasanje.

Amandmani I i II Nikole Špirića nisu dobili većinu prisutnih. Od 41 prisutnog poslanika u momentu glasanja ZA amandman I glasalo je 6, protiv 28, suzdržalo se 8 poslanika. ZA amandman II glasalo je 5, Protiv 26, suzdržalo se 10 poslanika.

Predsjedavajući je, poslije glasanja o amandmanima, na glasanje dao Prijedlog budžeta.

Od 41 prisutnog, ZA Prijedlog budžeta glasalo je 37 poslanika, dok su 4 poslanika bili suzdržani.

Predsjedavajući Doma konstatovao je da je Dom usvojio Budžet institucija Bosne i Hercegovine i međunarodnih obaveza Bosne i Hercegovine za 2003. godinu.

Uz Budžet, a na osnovu prijedloga Komisije za finansije i budžet i prijedloga iznesenih u diskusiji, Dom je usvojio sljedeće

ZAKLJUČKE

1. Zadužuje se novoizabrano Vijeće ministara da u roku od 60 dana od dana stupanja na dužnost pripremi rebalans Budžeta institucija BiH i međunarodnih obaveza BiH za 2003, kao i Zakon o izvršenju Budžeta institucija Bosne i Hercegovine i međunarodnih obaveza BiH za 2003. godinu.

2. Poziva se Vijeće ministara da Parlamentarnoj skupštini BiH dostavi Memorandum o razumijevanju i Izvještaj o monitoringu povodom Stand-by aranžmana.

3. Vijeće ministara će Parlamentarnoj skupštini dostaviti izvještaj o izvršenju Budžeta institucija BiH i međunarodnih obaveza BiH za 2002. godinu.

Zaključci su usvojeni jednoglasno. Prilikom glasanja bilo je prisutno 40 poslanika.

Ad – 2: Prijedlog zakona o izvršenju Budžeta institucija BiH i međunarodnih obaveza BiH za 2003. godinu

Predsjedavajući Ustavno-pravne komisije Mirsad Ćeman iznio je mišljenje Ustavno-pravne komisije o Prijedlogu zakona.

Beriz Belkić je obrazložio Izvještaj Komisije za finansije i budžet, koji su poslanici dobili. Napomenuo je da se u oba izvještaja (i o Budžetu i o Zakonu) ponavljaju isti zaključci, pa da zbog toga predlaže da se zaključak vezan za Zakon odnosi na to da će Zakon o izvršenju Budžeta u procesu rebalansa biti podložan promjenama za koje se ocijeni da su nužne, što je i na Komisiji prilikom razamtranja Zakona zaključeno.

Momčilo Novaković je, kao član Komisije za finansije i budžet, prigovorio da Komisija nije usvojila ovakav izvještaj, odnosno da on za ovakav izvještaj nije glasao. Naglasio je da u Izvještaju treba da stoji da je Komisija Izvještaj usvojila većinom glasova, kao što stoji da su većinom glasova odbijeni amandmani. Rekao je da je on glasao za zaključak da se u roku od 60 dana, kada se bude usvajao rebalans, usvoji i novi zakon o izvršenju budžeta.

Beriz Belkić je odgovorio da je tačno da postoje određne stvari o kojima je na komisiji razgovarano, a nisu u Izvještaju, te da je tačno i ovo za Zakon o izvršenju budžeta, i kada budemo razgovarali preporučićemo to, rekao je, pored ostalog, Beriz Belkić.

Predsjedavajući Džaferović otvorio je raspravu o Prijedlogu zakona o izvršenju Budžeta u prvom čitanju.

U diskusiji u prvom čitanju učestvovali su Nikola Špirić, Momčilo Novaković, Azra Hadžiahmetović, Tihomir Gligorić, Beriz Belkić, Borislav Paravac, Munib Jusufović, Seada Palavrić i Mladen Potočnik.

Poslije diskusije predsjedavajući je dao pauzu od 30 minuta na zahtjev Kluba poslanika SDS-a.

Nakon pauze Momčilo Novaković obavijestio je Dom da je Klub SDS-a u toku pauze analizirao amandmane, kao i Zakon o Vijeću ministara, i da je odlučio da povuče amandmane imajući u vidu da član 18. Zakona o Vijeću ministara obezbjeđuje zaštitu interesa Republike Srpske, kao i to da imaju veliku odgovornost danas kako bi se usvojio i Zakon o izvršenju Budžeta.

Dalje su diskutovali Miloš Jovanović, Tihomir Gligorić, Nikola Špirić, Mirko Blagojević i Borislav Paravac, kao i zamjenik ministra za trezor Muharem Imamović.

Poslije diskusije predsjedavajući je dao na glasanje Prijedlog zakona u prvom čitanju.

Prilikom glasanja prisustvovao je 41 poslanik. ZA Prijedlog zakona glasalo je 35, protiv 5, jedan poslanik je bio suzdržan. Prema tome, Prijedlog zakona o izvršenju budžeta usvojen je u prvom čitanju.

U drugom čitanju o Prijedlogu zakona nije bilo diskusije, pa je predsjedavajući odmah na glasanje dao amandmane na Prijedlog zakona koje je poslanik Nikola Špirić podnio i u plenarnoj fazi.

Dom je većinom glasova odbio amandmane Nikole Špirića, sa sljedećim rezultatima glasanja:

- Amandman I – prisutan 41 poslanik, ZA glasalo 10, protiv 24, suzdržalo se 5;
- Amandman II – ZA glasalo 12, protiv 22, suzdržalo se 7.
- Amandman III – ZA glasalo 12, protiv 21, suzdržalo se 7 poslanika.

Nakon glasanja o amandmanim, Dom se izjasnio i o Prijedlogu zakona, kojom prilikom je ZA Prijedlog zakona glasalo 36 poslanika, a 5 ih je glasalo protiv.

Predsjedavajući je konstatovao da je Predstavnički dom usvojio Zakon o izvršenju Budžeta institucija Bosne i Hercegovine i međunarodnih obaveza BiH za 2003. godinu.

Zaključujući 3. sjednicu predsjedavajući Šefik Džaferović zahvalio se poslanicima i pozvao predsjedavajuće poslaničkih klubova na sastanak Proširenog kolegija radi dogovora o sastavu komisija i sazivanju naredne sjednice Doma.

Sjednica je završena u 16,15 sati.

Sastavni dio Zapisnika je transkript Treće sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović